

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-1829/19  
Sarajevo, 4.10.2019. godine

**Z A P I S N I K**  
**3. SJEDNICE DOMA NARODA PARLAMENTA FEDERACIJE BOSNE I  
HERCEGOVINE, održane 4. oktobra 2019. godine**

Sjednica je počela u 10.40.

Sjednicom je predsjedavao Tomislav Martinović, predsjedavajući Doma naroda Parlamenta Federacije Bosne i Hercegovine.

Predsjedavajući je pozdravio delegate, predstavnike Vlade Federacije, predstavnike medija i sve prisutne trećoj sjednici Doma naroda Parlamenta Federacije Bosne i Hercegovine.

Izostanak sa sjednice najavili su: Mirela Trepanić, Hadis Jusić i Zora Dujmović.

Prema evidenciji Stručne službe, sjednici prisustvuje 50 delegata što čini većinu pa Dom naroda može raditi i punovažno odlučivati.

Prije prelaska na rad predsjedavajući je zamolio prisutne da ustanu i minutom šutnje odaju počast nedavno preminulom delegatu Zdravku Bešliću.

Nakon toga je Igor Stojanović u ime sedam delegata srpskog naroda podnio Inicijativu za nastavak konstituirajuće sjednice Kluba delegata srpskog naroda i s tim u vezi zatražio pauzu.

Nakon pauze predsjedavajući je podsjetio delegate da se na klupama nalazi anketni listić dostavljen od OSCE-a, a koji delegati treba da popune i dostave stručnoj službi.

Potom je Igor Stojanović izvjestio Dom naroda da nije uspio pokušaj nastavka konstituirajuće sjednice Kluba delegata srpskog naroda zbog nedostatka kvoruma nakon čega se razvila diskusija u kojoj su učestvovali: Igor Stojanović, potpredsjedavajući Doma naroda, Aljoša Čampara, Mladen Simić, predsjedavajući Doma naroda, Tomislav Martinović, Vibor Handžić,

Aner Žuljević, Dragan Stevanović, sekretar Doma naroda, Izmir Hadživdić, Goran Broćeta, Žarko Vujović i Drago Puzigaća.

Prije prelaska na rad predsjedavajući je pozvao delegate da usvoje Zapisnik 2. sjednice Doma naroda.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine bez primjedbi, sa 38 glasova za, tri uzdržana glasa i jednim glasom protiv usvojio Zapisnik 2. sjednice Doma naroda Parlamenta Federacije Bosne i Hercegovine održane 18. jula 2019. godine.

Potom je predsjedavajući podsjetio delegate da na osnovu člana 109. Poslovnika o radu Doma naroda Parlamenta Federacije Bosne i Hercegovine ukoliko žele mogu postavljati delegatska pitanja ili pokretati inicijative.

### **Delegatska pitanja i inicijative**

**Dragan Stevanović** je postavio pitanje Vladi Federacije i Federalnom ministarstvu zdravstva u vezi analiziranja realizacije strateških učinaka i ostvarivanja ciljeva utvrđenih u Strategiji razvoja zdravstvenog sistema u Federaciji Bosne i Hercegovine za period 2008. – 2018. godina. Upitao je da li je vršena godišnja analiza ostvarivanja ovih ciljeva i da li su pravljene korekcije. Postavio je pitanje da li su prikupljeni odgovarajući parametri za izradu Strategije razvoja zdravstvenog sistema u Federaciji Bosne i Hercegovine za period 2018. - 2028. godina.

**Boris Krešić** je najprije izrazio nezadovoljstvo odgovorom Federalnog ministarstva finansija u vezi kršenja rokova za rješavanje po žalbama na rješenja Porezne uprave Federacije BiH o pravu na lični odbitak.

Tri pitanja je postavio Federalnom ministarstvu pravde -

U kojoj fazi je proces usvajanja Zakona o sprječavanju sukoba interesa u Federaciji Bosne i Hercegovine?

U kojoj fazi je proces imenovanja članova radne grupe za analizu propisa koji se odnose na prava i obaveze istospolnih parova u Federaciji BiH?

U kojoj fazi je izrada Prijedloga zakona o slobodi okupljanja u Federaciji BiH?

Pitanje je postavio i predsjedavajućem Doma naroda i Vladi Federacije u vezi usvajanja Zakona o zaštiti prijavitelja korupcije.

**Damir Marjanović** je postavio dva pitanja Federalnom ministarstvu obrazovanja i nauke.

Postavio je pitanje u vezi analize izdvajanja sredstava za razvoj nauke i istraživanja u Federaciji Bosne i Hercegovine i o učinku projekata koji su dobili podršku na razvoj privrede.

Drugo pitanje je vezano za omogućavanje privatnim univerzitetima prijavljivanja na konkurse za dodjelu sredstava za projekte.

**Ljubinka Atanasijević** je postavila pitanje Centralnoj izbornoj komisiji Bosne i Hercegovine, MUP-u Kantona, općinskim izbornim komisijama i matičnim uredima općina i općinskih izbornih komisija u vezi zakona na osnovu kojeg se ažuriraju birački spiskovi, te dinamike ažuriranja ovih spiskova.

**Žarko Vujović** je postavio dva pitanja.

Prvo pitanje je postavljeno Federalnom ministarstvu prometa i komunikacija u vezi završetka radova na petlji Šićki Brod kod Tuzle.

Drugo pitanje je postavio premijeru Federacije i federalnoj ministrici kulture i sporta u vezi statusa zaslužnih sportista Bosne i Hercegovine i Federacije Bosne i Hercegovine.

**Segmedina Srna Bajramović** je pokrenula inicijativu za izmjene Krivičnog zakona Federacije Bosne i Hercegovine u smislu ukidanja mogućnosti osobama osuđenim na kaznu zatvora do jedne godine da kaznu zatvora zamijene novčanom kaznom.

**Edim Fejzić** je postavio dva delegatska pitanja.

Prvo pitanje postavio je Federalnom ministarstvu poljoprivrede, vodoprivrede i šumarstva u vezi raspodjele sredstava poljoprivrednicima u Bosansko - podrinjskom kantonu i koliko je procentualno iznosila potpora ovom Kantonu u odnosu na sredstva kojim je raspolagalo ovo Ministarstvo. Zatražio je i Informaciju sa kojim projektima je Ministarstvo privrede Bosansko - podrinjskog kantona apliciralo na sredstva u period 2015. - 2018. godina.

Drugo pitanje je postavio Vladi Federacije u vezi izrade zakona kojim bi se otklonile poteškoće u pokretanju malih i srednjih preduzeća i dostavljanja istog u parlamentarnu proceduru.

**Jasmin Duvnjak** je ponovo pokrenuo inicijativu vezanu za izmjenu i dopunu Zakona o pripadnosti javnih prihoda u Federaciji Bosne i Hercegovine.

Postavio je pitanje u vezi mapiranja i registrovanja divljih deponija u Federaciji Bosne i Hercegovine.

Postavio je pitanje u vezi uslova rada Federalnog pravobranilaštva.

**Aner Žuljević** je postavio dva pitanja. Prvo se odnosi na Projekat kolektora u Mostaru, a drugo na deponiju Uborak u Mostaru.

Potom je predsjedavajući dao pauzu.

Nakon pauze predsjedavajući je pozvao delegate da nastave sa postavljanjem delegatskih pitanja i pokretanjem inicijativa:

**Zdenka Džambas** je postavila pitanje Vladi Federacije Bosne i Hercegovine, da li se vodilo računa o proporcionalnoj zastupljenosti konstitutivnih naroda, zajedno sa ostalima i građanima kako je propisano članom 2. Zakona o državnoj službi u Federaciji Bosne i Hercegovine prilikom provođenja Javnog konkursa u Federalnom ministarstvu poljoprivrede, vodoprivrede i šumarstva kojim se biralo šest rukovodećih državnih službenika? Nakon provedene konkursne procedure izabrano je pet Bošnjaka i jedan Hrvat.

Također je zatražila od Vlade Federacije Bosne i Hercegovine da dostavi imena svih pomoćnika ministara u Vladi Federacije kako po nacionalnoj tako i po spolnoj strukturi kao i imena direktora svih agencija, ureda i zavoda za čija imenovanja je nadležna Vlada Federacije.

Pokrenula je i Inicijativu da se u narednoj godini osiguraju određena budžetska sredstva kako bi se izvršila modernizacija sale i time stvorili bolji uslovi za rad delegata Doma naroda u pogledu sredstava za glasanje, praćenje, materijala za sjednice i drugo.

**Ivan Ivić** postavio je pitanje članu Predsjedništva Bosne i Hercegovine, Šefiku Džaferoviću u vezi njegove izjave da je: "HVO zločinačka organizacija", te pita: "da li je to i zvanični stav člana Predsjedništva Šefika Džaferovića, odnosno da li je to stav institucije ako je poznato da sličan stav ima i tzv. hrvatski član Predsjedništva Željko Komšić?"

**Zvonko Marić**, je postavio nekoliko delegatskih pitanja te je izjavio da podržava Inicijativu delegatkinje Zdenke Džambas, u vezi modernizacije i poboljšavanja uslova za rad u sali Parlamenta Federacije BiH.

Prvo pitanje je postavio Vladi Federacije, a odnosilo se na redovno snabdjevanje plinom građana Federacije Bosne i Hercegovine, u smisli da li Vlada Federacije može dati garancije da će konekcija na "Južnu inter konekciju" biti završena do 2023. godine, kako Federacija Bosne i Hercegovine ne bi strahovala od nestanka plina pred svaku grijnu sezonu.

Drugo pitanje je postavio kantonalnoj ministrici zdravstva, a odnosi se na to koliko se građana Federacije liječi u Kliničkom centru Univerziteta u Sarajevu, te da li u skladu s tim plaćaju participaciju u finansiranju KCUS-a ili sve pada na teret Kantona Sarajevo.

Postavio je pitanje Vladi Federacije, šta je sporno u vezi imenovanja Upravnog odbora KCUS te zatražio da se Vlada Federacije Bosne i Hercegovine izjasni o ovom problemu.

Također je postavio pitanje u vezi povećanja cijene plina iako je visoki dužnosnik BH gasa, izjavio da neće doći do povećanja cijene plina kao i to na koji način je eliminiran Energoinvest iz lanca snabdjevanja plinom.

Postavio je pitanje Vladi Federacije Bosne i Hercegovine o nedostatku novca u vezi zahtjeva Tužiteljstva HNK-a o potrebi vanredne kontrole poslovanja Aluminijska d.d. Mostar od strane Finansijske policije. Za ovu kontrolu je bilo potrebno izdvojiti 10.000 konvertibilnih maraka.

**Mladen Simić** je postavio pitanje Federalnoj upravi za inspeksijske poslove, odnosno Federalnom urbanističko - ekološkom inspektoratu u vezi poslova koje obavlja federalni inspektor u Arcerol Mitalu, šta je do sad poduzeo od dana imenovanja, koje mjere i radnje donosi, da li je bilo ekoloških incidenata i koje su sankcije izrečene prema odgovornim.

**Vibor Handžić** je pokrenuo Inicijativu o izmjeni člana 19. Zakona o cestovnom prijevozu u vezi uslova za obavljanje taksi djelatnosti za osobe sa invaliditetom.

**Vesna Saradžić** je postavila dva pitanja.

Prvo pitanje je postavila Vladi Federacije, a odnosi se na potrebu donošenja Zakona o upotrebi znakovnog jezika u Federaciji Bosne i Hercegovine, odnosno kada će Federacija Bosne i Hercegovine imati takav zakon.

Drugo pitanje je postavila Federalnom ministarstvu zdravstva, a odnosi se na to da li je zakonom regulisano da se djeca koja nisu redovno vakcinisana ne mogu upisati u predškolske ustanove, osnovne i srednje škole, fakultete i kolektivni smještaj. Ako je regulisano, kojim zakonom, upitala je.

Nakon delegatskih pitanja prešlo se na utvrđivanje dnevnog reda.

Predsjedavajući je podsjetio da je Vlada Federacije dostavila Prijedlog zakona o izmjenama Zakona o visini stope zatezne kamate na javne prihode s prijedlogom da se razmatra po hitnom postupku.

Zatim je pozvao delegate da se na osnovu člana 188. Poslovnika o radu Doma naroda izjasne da li će ovaj prijedlog zakona razmatrati po hitnom postupku.

Na osnovu rezultata glasanja, predsjedavajući je konstatovao da, Dom naroda Parlamenta Federacije Bosne i Hercegovine nije usvojio ovaj

prijedlog jer je za glasalo 23 delegata, osam delegata je bilo suzdržano, a 12 protiv.

Predsjedavajući je podsjetio da je Vlada Federacije dostavila sljedeće prijedloge zakona da se razmatraju po skraćenom postupku: Prijedlog zakona o izmjenama i dopunama Zakona o prekršajima i Prijedlog zakona o dopunama Zakona o prostornom planiranju i korištenju zemljišta na nivou Federacije Bosne i Hercegovine.

Prije izjašnjavanja o ovom prijedlogu Iva Tadić, predsjednik Kluba delegata hrvatskog naroda je zatražio da se Prijedlog zakona o izmjenama i dopunama Zakona o prekršajima skine s dnevnog reda jer sjednici Kluba nije prisustvovao predlagatelj zakona.

Potom je predsjedavajući stavio na glasanje prijedlog da se Prijedlog zakona o izmjenama i dopunama Zakona o prekršajima razmatra po skraćenom postupku.

Na osnovu rezultata glasanja, predsjedavajući je konstatovao da Dom naroda Parlamenta Federacije BiH nije prihvatio da se Prijedlog zakona o izmjenama i dopunama Zakona o prekršajima razmatra po skraćenom postupku, jer je za glasalo 11 delegata, 15 delegata je bilo uzdržano, a 16 protiv.

Nakon toga je predsjedavajući stavio na glasanje prijedlog da se Prijedlog zakona o dopunama Zakona o prostornom planiranju i korištenju zemljišta na nivou Federacije Bosne i Hercegovine razmatra po skraćenom postupku.

Na osnovu rezultata glasanja, predsjedavajući je konstatovao da Dom naroda Parlamenta Federacije BiH nije prihvatio da se Prijedlog zakona o dopunama Zakona o prostornom planiranju i korištenju zemljišta na nivou Federacije Bosne i Hercegovine razmatra po skraćenom postupku, jer je za glasalo 20 delegata, 10 delegata je bilo uzdržano, a 14 protiv. Predsjedavajući je konstatovao da će se ova tri zakona razmatrati u formi nacrtu zakona, ako se usvoji dnevni red ove sjednice.

Potom je predsjedavajući stavio na glasanje i, na osnovu rezultata glasanja, konstatovao da Dom naroda Parlamenta Federacije BiH nije usvojio predloženi dnevni red, jer je za glasalo 20 delegata, šest delegata je bilo uzdržano, a 17 protiv.

Sjednica je završena u 14.55 sati.

Transkript sjednice čini sastavni dio Zapisnika.

SEKRETAR

Izmir Hadžiavić

PREDSJEDAVALAČI

Tomislav Martinović